



Broj: 01,02,03,04/4-05-2-1679/24

Sarajevo, 14. 10. 2024

15. 10. 2024

KOLEGIJ SEKRETARIJATA

Parlamentarne delegacije zemalja članica Centralnoevropske inicijative (CEI) učestvovalе su na sjednici Parlamentarne skupštine parlamentarne dimenzije CEI-a održanoj u Tirani 1. oktobra 2024. pod albanskim predsjedavanjem CEI-em.

Osim predstavnika parlamenta domaćina, Albanije, sjednici su prisustvovali poslanici, službenici parlamenata i diplomate iz Crne Gore, Bosne i Hercegovine, Bugarske, Hrvatske, Italije, Mađarske, Poljske, Rumunije, Sjeverne Makedonije, Slovenije, Slovačke i Ukrajine.

Sjednica, kojom je predsjedavao Etjen Xhafaj, predsjednik Delegacije Parlamenta Albanije u parlamentarnoj dimenziji CEI-a, bila je fokusirana na temu „Jačanje regionalne saradnje kao osnovnog faktora za evropsku integraciju“.

Uvodne riječi na plenarnoj sjednici imali su Elisa Spiropali, predsjednica Parlamenta Albanije, Endrit Yzeiraj, zamjenik albanskog ministra za Evropu i vanjske poslove, i Silvio Gonzato, ambasador EU u Albaniji.

Obraćajući se prisutnim delegacijama, zamjenica generalnog sekretara CEI-a Zsuzsanna Kiraly, istaknula je da je regionalna saradnja ključna za integraciju u EU i stabilnost. Posebno je pozvala na pojačanu predanost saradnji i proširenju EU kao načinu jačanja sigurnosti.

Delegacije su aktivno učestvovalе u raspravi i razmijenile mišljenja o potrebi jačanja regionalne saradnje kako bi se odgovorilo na globalne izazove i osigurala održiva budućnost.

Sjednica je zaključena usvajanjem zajedničke Završne deklaracije Parlamentarne skupštine CEI-a. Ključne preporuke Završne deklaracije uključuju poticanje dijaloga među državama članicama Centralnoevropske inicijative za promoviranje mira i stabilnosti, poticanje privrednog razvoja kroz zajednička ulaganja i infrastrukturne projekte te podršku procesu proširenja EU s fokusom na regionalnu saradnju, ljudska prava i vladavinu prava. U Deklaraciji se također poziva na jače kulturne, obrazovne i inicijative za mlade kako bi se ojačale regionalne veze te potaknula ulaganja u istraživanje i inovacije za poticanje privrednog rasta.


Prije plenarne sjednice PSCEI-a održani su sastanci tri komiteta: Generalnog komiteta za ekonomska pitanja, Generalnog komiteta za kulturna pitanja i Generalnog komiteta za politička pitanja i unutrašnje poslove na kojima su izabrani predsjednici i zamjenici predsjednika ovih radnih tijela.

Za predsjednika Generalnog komiteta za ekonomska pitanja izabran je Salvatore Caiata (Italija), a za zamjenika predsjednika Etjen Xhafaj (Albanija).

Predsjednik Generalnog komiteta za politička pitanja i unutrašnje poslove je Igor Chiriac (Moldavija), a zamjenik predsjednika Roberto Menia (Italija).

Predsjednik Generalnog komiteta za kulturna pitanja je Ivan Belchev (Bugarska), a zamjenik predsjednika Eugen-Remus Negoj (Rumunija).


U prilogu Izvještaja dostavlja se usvojena zajednička Završna deklaracija PSCEI-a.

Izvještaj pripremila:

Dubravka Ištuk-Pavlović

Sektor za međunarodne odnose i protokol

Dostaviti:

- Naslovu
- Članovima delegacije PS BiH u CEI
- Sektoru za međunarodne odnose i protokol
- Komisiji za vanjske poslove ZD
- Komisiji za vanjsku i trgovinsku politiku, carine, promet i veze Doma naroda
- Sektoru za odnose s javnošću
- a/a



**PARLAMENTARNA SKUPŠTINA PARLAMENTARNE DIMENZIJE
CENTRALNOEVROPSKE INICIJATIVE**

Tirana, 30. septembar i 1. oktobar 2024.

ZAVRŠNA DEKLARACIJA

U Tirani je 1. oktobra 2024. pod predsjedavanjem Republike Albanije zasjedala Parlamentarna skupština parlamentarne dimenzije Centralnoevropske inicijative.

Skupštini su prisustvovala delegacije parlamenata i učesnici iz Albanije, Bosne i Hercegovine, Bugarske, Hrvatske, Mađarske, Italije, Crne Gore, Sjeverne Makedonije, Poljske, Rumunije, Slovenije i Ukrajine.

Nakon razmjene mišljenja o temi: „*Jačanje regionalne saradnje kao osnovnog faktora evropskih integracija*“, učesnici su usvojili sljedeću završnu deklaraciju:

Uzimajući u obzir Zajedničku deklaraciju sa sastanka Parlamentarnog odbora održanog u Tirani, 1. jula 2024;

Uzimajući u obzir *Preporuke za jačanje Centralnoevropske inicijative* koje je usvojila Konvencija za jačanje Centralnoevropske inicijative okupljena u Rimu, 5. jula 2024;

Centralnoevropska inicijativa, kao struktura posvećena promoviranju stabilnosti i razvoja u ovom dijelu Evrope, jačanje regionalne saradnje smatra važnim faktorom evropskih integracija.

S obzirom na globalne promjene i izazove, za centralnoevropsku regiju neophodno je jačanje saradnje kako bi se osigurala održiva budućnost, integrirana u Evropsku uniju.

U tom kontekstu, Parlamentarna skupština parlamentarne dimenzije Centralnoevropske inicijative:

Pozdravlja usklađivanje politika u oblasti sigurnosti, pravde i vanjske politike kako bi se pomoglo uspostavljanju zajedničke stabilnosti u regiji;

Potiče jačanje dijaloga i koordinacije između centralnoevropskih država, kao ključnog faktora u suočavanju sa zajedničkim izazovima za promoviranje stabilnosti i mira;

Naglašava poticanje zajedničkog djelovanja i saradnje među parlamentarcima u rješavanju zajedničkih izazova i interesa;

Pohvaljuje podršku i ulaganje EU u regionalni privredni i društveni razvoj, kao ključni faktor integracije u Evropsku uniju;

Promovira povećanje zajedničkih ulaganja i unapređenje infrastrukturnih projekata za regionalni privredni razvoj i osiguranje dublje integracije u privredne strukture Evropske unije;

Cijeni podršku CEI-ja nastavku procesa evropskih integracija zemalja kandidata i predanost zemalja članica EU u daljnjem procesu proširenja;

Podsjeća da je politika proširenja jedna od najuspješnijih politika EU i poziva na uravnotežen, vjerodostojan proces pristupanja zasnovan na zaslugama;

Ponovo potvrđuje da je razmjena zajedničkih iskustava u okviru Centralnoevropske inicijative veliki doprinos uspješnoj integraciji te se stoga predlaže intenziviranje uključivanja parlamenata Centralnoevropske inicijative u različite aktivnosti izgradnje kapaciteta kako bi se osigurala uspješna integracija;

Potiče stvaranje mogućnosti za organiziranje zajedničkih društvenih događanja mladih, što će pomoći u jačanju veza među narodima u regiji i promoviranju društvenog sklada;

Poziva na izradu zajedničkih projekata za promoviranje kulture, obrazovanja i turizma koji će doprinijeti jačanju zajedničkog identiteta i jačanju društvenih veza među narodima u regiji;

Ima za cilj povećati ulaganja u naučna istraživanja i razvoj novih i inovativnih tehnologija za jačanje konkurentnosti i privrednog razvoja u regiji;

Podržava Akcioni plan CEI-ja za period 2024 – 2026. za ispunjavanje potreba država članica i njegovu misiju za postizanje dva strateška cilja za regiju, evropsku integraciju i održivi razvoj;

Pozdravlja spremnost Skupštine Srbije da preuzme sljedeće predsjedavanje Centralnoevropskom inicijativom za 2025, a konačna odluka bit će usvojena na sastanku ministara vanjskih poslova, koji će biti održan u Tirani, u novembru 2024.